

## REGLUGERÐ

### um bólusetningu sauðfjár og geita til varnar garnaveiki.

#### 1. gr.

Bólusetning til varnar garnaveiki skal framkvæmd á öllum ásetningslömbum og ásetningskiðum ár hvert á landinu öllu, að undanteknum eftirtöldum svæðum: Hofshreppur, Austur-Skaftafellssýsla, Vestur-Skaftafellssýsla, Vestfjarðakjálki norðan varnargirðingar úr Gilsfirði í Bitrufjörð, Austfjarðahólf milli Lagarfljóts og Reyðarfjarðar og Héraðshólf milli Jökulsár á Brú og Lagarfljóts.

Þrátt fyrir ákvæði 1. mgr. skal bólusetja í Reykjarfjarðarhreppi í Norður-Ísafjarðarsýslu.

#### 2. gr.

Bólusetning skal fara fram á tímabilinu 15. september til 31. desember ár hvert.

Bólusetja skal aftast í snögga blettinn við hægri olnboga. Tilraunastöð Háskóla Íslands í meinafræði að Keldum skal að öðru leyti veita nauðsynlegar upplýsingar um framkvæmd bólusetningar og meðferð fjár að henni lokinni.

#### 3. gr.

Sýslumenn eða lögreglustjórar skulu, hver í sínu umdæmi og í samráði við sauðfjársjúkdómanefnd, skipa eftirlitsmenn með framkvæmd bólusetningarinnar. Starfið er uppsegjanlegt af beggja hálfu með þriggja mánaða fyrirvara miðað við 15. september ár hvert. Skipun framlengist sjálfkrafa til eins árs í senn, ef hvorugur segir upp.

Eftirlitsmenn skulu í samráði við sveitarstjórnir (bæjarstjórnir) útnefna bólusetningarmenn, einn til tvo í hverjum hreppi eða bæjarfélagi. Heimilt skal að ráða fleiri bólusetningarmenn, ef bólusettir eru margir aldursflokkar sauðfjár sama ár t.d., þegar bólusetning er hafin á nýju svæði. Einnig er heimilt að sami maður bólusetji fé í fleiri hreppum, ef hentara þykir að dómi eftirlitsmanns.

#### 4. gr.

Eftirlitsmenn skulu hlutast til um, að nægilegt bóluefni sé ætíð fyrir hendi, þegar bólusetning skal fara fram, einnig viðhlítandi útbúnaður til bólusetningar.

#### 5. gr.

Sveitarstjórnnum er heimilt í samráði við eftirlitsmenn, að láta bólusetningarmenn framkvæma skoðun á bólusettu saufé og geitum til könnunar á árangri bólusetningar um það bil mánuði eftir bólusetningu. Komi í ljós, að eigi séu finnanleg merki eftir fyrri bólusetningu, skal bólusetja á ný svo fljótt sem verða má.

Eftirlitsmenn skulu safna skýrslum frá bólusetningarmönnum um framkvæmd bólusetningar og endurbólusetningar og senda þær sauðfjársjúkdómanefnd að því loknu.

## 6. gr.

Nú hefur eigandi af einhverjum ástæðum ekki látið bólusetja ásetningsslömb eða kið, sem skylt er að bólusetja innan tilskilins tíma og skal þá oddviti (bæjarstjóri) gera eftirlitsmanni aðvart. Skal þá eftirlitsmaður í samráði við lögreglustjóra gera ráðstafanir til þess að féð verði bólusett á kostnað eigenda eða umráðamanna, eins fljótt og við verður komið.

## 7. gr.

Þóknun fyrir starf eftirlitsmanns skal greiða að hálfu úr sveitarsjóði (bæjarsjóði) og að hálfu úr ríkissjóði.

Sauðfjársjúkdómanefnd ákveður þóknun til eftirlitsmanna og úrskurðar ferðakostnaðar- reikninga þeirra. Bóluefni, útbúnað til bólusetningar og kaup bólusetningarmanna skal greiða úr viðkomandi sveitarsjóði (bæjarsjóði), en þeim kostnaði má síðan deila niður á fjáreigendur í hlutfalli við bólusett fé.

## 8. gr.

Brot gegn ákvæðum reglugerðarinnar varða refsingu samkvæmt lögum nr. 23/1956. Með mál út af brotum skal farið að hætti opinberra mála.

Reglugerð þessi er sett samkvæmt heimild í 44. gr. laga nr. 23/1956, með síðari breytingum og lögum nr. 77/1981, og öðlast þegar gildi. Jafnframt fellur úr gildi reglugerð nr. 414 22. nóvember 1976 um bólusetningu sauðfjár til varnar garnaveiki og reglugerð nr. 418 18. október 1990 um breytingu á henni.

*Landbúnaðarráðuneytið, 15. nóvember 1991.*

**Halldór Blöndal.**

*Jón Höskuldsson.*

## AUGLÝSING

### um staðfestingu á breytingu á aðalskipulagi Mosfellsbæjar í Mosfellsdal.

Samkvæmt skipulagslögum nr. 19, 21. maí 1964 hefur ráðuneytið þann 25. nóvember 1991 staðfest breytingu á aðalskipulagi Mosfellsbæjar (áður Mosfellsshrepps) 1983–2003. Breytingin tekur til hluta Mosfellsdals og afmarkast skipulagssvæðið til norðurs af 100 m hæðarlínu í suðurhlíðum Mosfells, til austurs af 100 m hæðarlínu í vesturhlíðum Grímannsfells og beint í norður um Jónstótt og bæinn Laxnes og áfram þaðan í norðvestur. Skammadalssvegur frá Þjóðvegi að ármótum Suðurár og Markalækjar og þaðan beint í austur er afmörkun skipulagssvæðisins til suðurs, en ármót Suðurár og Köldukvíslar og bein stefna þaðan í norður og suður afmarkar svæðið til vesturs.

Uppdráttur og greinargerð hafa hlotið þá meðferð sem skipulagslög nr. 19/1964 mæla fyrir um og samþykki Skipulagsstjórnar ríkisins og bæjarstjórnar Mosfellsbæjar.

*Umhverfisstjórnuneytið, 25. nóvember 1991.*

**Eiður Guðnason.**

*Páll Línadal.*